



Senin, 11 Oktober 2021
Ogen: Efesus 5: 16-17



Makeken Kesempatan



Paksa-paksa bas kegeluhenta enda paskel bagi lau si maler. Amin gia tetap inganta tedis, tapi lau si nggo mentas ku bernehna lanai mbera mulihkan ndigan pe. Lau e igancihken terus alu lau si mbaru. Emaka amin gia rulih-ulih nge wari-wari senin seh ku mingguna, janah matawari tetap pultak erpagi-pagi, tapi labo banci ngulih wari-wari bagepe paksa-paksa si nggo mentas arah kita.

Erkitekten kesadaran maka manusia labo ngasup ngaturken kegeluhenna alu gegehna jine emaka rasul Paulus pe nehken kata ajar man perpulungen Efesus. Tenah Paulus e me gelah perpulungen e metenget kerna paksa-paksa geluhna. Wari-wari enda jahat, bage nina Paulus, enda ngatakenca makana adi la si pergunakan waktunta alu sikap banci waktu ntah kesempatan e ipake si iblis nehken sura-surana si mpeturah penyesalenta, si erbahanca ndele ateta i bas wari-wari si reh.

Gelah ula jadi si bagenda rupa nge makana tole Rasul ngatakenca gelah sipakelah wari-wari geluhna enda guna mpebagesi penandanta nandangi Tuhan ras peratenNa. Peraten Tuhan kerina erguna, mehuli ras maba kedamen. Emaka kerina si mehuli arah Pustaka Si Badialah si lakoken i bas makeken kesempatan geluh si lit enda. Sabab Kata Dibata mabai kita meteh apai benar ras apai si mehuli, kai si arus silahken kai ka si arus dalanken bas kegeluhen enda. Kata Dibata pe mpelimbarui perukuren ras perbahanenta.

Wari-wari geluhna ras paksa-paksa geluh enda i bas Tuhan nari kap rehna, e maka rusur sibelasken waktu enda e me kap kesempatan. Kesempatan guna ngaloken ras ngelaken perkuah ate Tuhan e. Emaka ula kita dongal, ola lakoken si sea-sea, ola ercuba-cuba ngelakoken dosa ras tetap jaga kiniteken e. Adi sipake waktunta alu sikap pertunduhta pe badeh.